

## CORINTI JÕ KRĨ WÛR

### Hapu Na Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ. Ne pê Jeju na mehkwy jakrã Corinti jõ krĩ kam mehkri atajê wÿr, pom cu me hõ kàhhôc cahyt ita kujate. Na pê hapu na hõ kàhhôc ita japry pê **Corinti Jõ Krĩ Kam Jeju Na Mehkwy Jakrã Mehkri Atajê Wÿr, Hapu Na Pawrô Jõ Kàhhôc** (2 Corinti).

Ne hõ kàhhôc itajê kam, cute ampo cunea to mehapackre, mãr quê nee me cumã mehtyc xà cupa to me ipa nare. Ne hanea ne cute me pamã me pajĩ tuw jarên.

He nee ite Corinti wÿr Pawrô te hõkàhhôc kujahêc atajê cunea to ipintuw nare, ne ihkwÿ jatujre atajê ri ite to ipintuw.

## 4

*Pê Pawrô Pahpãm mã hàpên na amji kôt harê  
2 Corinti 4.1-18*

*Me Hàpên Xà 19.23-40; Roman 1.11-12*

<sup>1</sup> Pê Pahpãm hàhcaprĩa kam, me ipê harkwa na me iprar catêjê na me ipyxwÿ ita kam, wa ha nee intête me amji hi kwĩn, ne ame ipec, ne me cumã ijàpên jicu nare.

<sup>2</sup> Ne wa quêt ampo kên pimxur cunea kam me pahpahãmti atajê cunea, wa ma ame ton caca, ne nee ame cumã me ihêj to me ipa nare. Ne neewa Pahpãm te harên xà kaj na me amã ihcupan xà nõ jarên to me ipa nare. Ne wa

quêt catyt kam me amã hirãa pê Pahpãm jarkwa jarën xà tocapô to me ipa. Ne wa Pahpãm kam mare mã, me cumã harkwa jarën to me ipa, mãr quê mehcunea, wa nee ame ihêj xi nare na, me ijahkre pej.

<sup>3</sup> Nãmri quê ha jũm te nee ite me ijũjarën xà ita par jahkre pej nare na, quê ha nee incwÿrjapê amji mã me icuhtom nare. Ne ampo na mã nee me kam hapac jahkre pej nare? Jũ wÿr quê ramã me ipictor to me mõi ita kamme kam hapac pej.

<sup>4</sup> Ne quê jũm ato caxwÿ, ca ha nee arît nare. Ita jĩkjê na mã Xatanaj pê pjê ita kam, cute amji kam me hapac xà kên jõi pahhi ita te, me cupê cute amji kam me hapac xà to kên, mãr quê neeJeju Crixto pê Pahpãm kra pê ampo kên catia pê me hũtâr catê ata na me hahkre pej nare. Jeju pê Hũam pyrác, na quê ha nee Pahpãm to amji mã mehhimpej nare ita kam, quê ha nee Jeju Crixto kôt me Pahpãm jahkre pej nare.

<sup>5</sup> Ne nee wa me pa, amji to me amã me icakôc nare, ne quêt Jeju Crixto pê me pajõ Pahhiti to, wa me amã me ijũjarën to me ipa. Ne Jeju cwÿrjapê ri me ipê me amã me ijàpên catêjê pit. Cwÿrjapê wa ame amã me amjijarën to me ipa.

<sup>6</sup> Ne pê Pahpãm pjê ton xà ata kam, awcapàtkô cunea to hamre prãmte, harën to: "Amcro" hane. Hamre pê amcro pyrentu, pahte me ampo cunea pupun, ne me hahkre pej xà caxuw ahcujro pyrentu. Ita jĩkjê na mã, ihhêj ne Pahpãm te me pamã pahte amji kam me pajapac xà kujro, cu ihkôt me ampocunea kampa, ne me hahkre pej. Ne Jeju Crixto tea ri me pamã Pahpãm to ipipê, na cu ha ihkôat me Pahpãm

carôt jàhcujro jahkre pej.

*Pō rūm me pajī peacre cacrô, mǎ kam Pahpām Carō Pejti carôt tỳj ihkrī*

<sup>7</sup> Ne pjê te pot na kyre pê hĩ jàhwỳr, ne ihcature, ne ihkre kam, ampo pejti na hĩ jàhwỳrti te hipu, ita na mǎ me ite. Ne me ijī peacre, neihcature cacrô, mǎ ihtỳj me amǎ ampo pej pit jarěn to ipa. Na quê ha mehcunea, ite Pahpām jarkwa kôt mehcunea mǎ harěn xà pejti jarěn ita na me ipupu. Ne Pahpām te ri imǎ caxuw ampo cunea jirô pêcarôt tỳjti ita jōr na me hahkre pej.

<sup>8-9</sup> Wa ampo cunea kam me amji pupun to kêanre cacrô,

mǎ nee cute me itohjê nare.

Ne ampo kwỳ kam amji jahkre kêatre cacrô,

wa nee amjia kôt ite me hicu nare.

Ne me icurê xwỳn ame icapôr cacrô,

mǎ nee Pahpām te meimǎ hikran nare.

Ne hǎn ne ihtỳj me ito kên cacrô,

wa nee me ijamre nare.

<sup>10-11</sup> Ne Jeju te me pancwỳrjapê mehcuran xà mǎ amji jōr, mǎ cute mehcuran. Jīkjê na, wa itỳj me amǎ Jeju te amji kam hapac xà pejtijarěn xà mǎ amji jōr to ipa. Ne ite me amǎ harěn xà ata kôt, ca ha me atĩrrohnỳtti mǎ na me apa xà ata, ihtỳj mehcunea mǎ Jeju te hacpỹa mǎ ihtĩr na harěn. Ne wa Jeju cwỳrjapê amji to me ikên cunea japên to me ipa.

<sup>12</sup> Ne ite amji to me ikên japên to me ipa xà ita kôt, ca ha me atĩr rohnỳtti mǎ na me apa.

<sup>13</sup> Pê pahhi xwỳ pê Tawi ata, ita na Pahpãm jarkwa kôt hõ kàhhôc kam ihhôc to hane he:

“Imãa, Pahpãm jũjarẽn xà ita pê nee ihhêj xi nare,  
na wa itỳj amji mã to ihmpej,  
ne me amã harẽn to me ipa” hane.

Na wa itỳj cuxà Pahpãm to amji mã me ihmpej to me ipa, ne itỳjcuxà me amã Pahpãm jũjarẽn xà jarẽn to me ipa.

<sup>14</sup> Ne ampo na mã wa Pahpãm to amji mã me ihmpej? Wa ite, cute hacpỹa mã me pajõ Pahhiti pê Jeju to ihtĩr na me hahkre pej, na quê ha ihtỳj cuxà me ito itĩr, ne hanea ne me ato me atĩr. Na cu ha pahỳjjũ caxuw me pahcunea cuxà hỹrmã me api, necahê na ame papa rohnỳtti mã.

<sup>15</sup> Ne me acwỳrjapêa ri, ite me amji pupun xà kêanre itajê jàhtôa to hàhtô. Ne me imã pjê cunea kam, me hàhtôa ne Pahpãm wỳr me ipipkjêr na me to prãm, mār quê Pahpãm mehcunea caprĩ, ne mehkên pê me hũtà. Mār quê me hàhtôa to me hàhtô, ne Pahpãm te ampo kên pê me hũtār pyrên me hakry na, cumã me amji jarẽn catia to me ipa.

*Cu ha pahỳj Pahpãm to amji mã me pahhimpej kam me to pancrà*

<sup>16</sup> Ne amcro cunea kam, me pahkà amji to hamre to mõi cakrô, mã me pahcaxwãm pê pahte amji kam me pajapac xà ihtỳj amji to intuw to mõi. Na cu ha nee Pahpãm mã me pajàpên tète me amji hi kwĩn, ne me hicu nare.

<sup>17</sup> Ne pahte amji pupun xà to kânre kênre, kên pejti te cyt ne imprar atajê jahpan xà na, quê ha Pahpãm amji cahê na me papa na me pahto, ne ampo kên ita jirôa pê me pahto impej catia to catito ihcuhhê rohnÿtti mã.

<sup>18</sup> Ne por cu pjê kam me panto to me ampo pupu atajê, quê ha ihtÿj jũ caxuw hamre. Ne quêt cõjkwa kam pahte me ampo pupun nare atajê, quê ha hàhhuc rohnÿtti mã. Cwÿrjapê cu ha nee ita ri, pjê kam, pahte me ampo pupunitajê to ame pajàptõ nare. Ne quêt cõjkwa kam, cormã nee pahte me hõmpun nare atajê to, cu ha pahtÿj me amji japackre to me papa.

## 5

*Nee pahte me pajĩ tuw pupun nare cakrô, ramã to me pajapac xà*

*2 Corinti 5.1-21*

*2 Petrô 1.13-14*

<sup>1</sup> Quê ha jũm ikre pejti catia nõ ton xwÿjrea na, ramã amji mã ikre cahàc nõ xãm ne kam ihkrĩ. Ne cute ramã ikre catia ata jipêj jirô pê, quê ha ikre cahàc ata hu, ne ma cute intuw jipêj ata mã axà, ne kam ihkrĩ. Jĩkjê na mã me pajĩ pê me pahcaxwÿn carõ krekà te hajÿar. Neramã pahte me Pahpãm te cõjkwa kam me pahcaxwÿn carõ mã, hĩ tuw jipêj na me hahkre pej. Ne quê ha jũ caxuw me pajĩ pê ikre cahàc pyràcti itaty, quê ha caxwÿn carõ ata ihtÿj cõjkwa kam me pajĩ tuw pê ikre cati pyràcti ata kam ihkrĩ. Ne Pahpãam te ri me pamã me pajĩ tuw pê ikre pejti pyràcti ata ton, naquê ha nee jũ caxuw hamre nare.

2-3 Ne pom quê ha jũm ikre cahàc pê ihkrĩ xà kèanre kam ihkrĩ, ne ihtỳj ikre pejti ata mã hàr ne kam ihkrĩ pyrentu to prãm, ita na mã mepajĩ te, ne ihtỳj me pajĩ ita rer pyrentu to prãm. Ne ma còjkwa kam me pajĩ tuwti te jũ caxuw hamre xà nare ata mã hàr, ne kam ihkrĩ to prãmto, me to pajapac xà te me pahcagãgã.

4 Ne pom cu pjê kam me pajĩ to ame papa xà ita kam, cu pahtỳj ame pahcagãgã to me papa. Ampo na? He nee mã me pahte me pajĩ tũm ata cacaxà to nare. Ne quêt intuw ata mã hàr ne kam apu ipa to prãm to, cu ame pahcagãgã. Ne cu ha me pajĩ tuw te jũ caxuw hamre xà nare ata kam ame papa, ne nee hipêr me pajĩ tũm, ramã hamre to mõi ata to me amji japaackrenare.

5 Ne pê Pahpãm ramã mam ita to amji kampa. Ne cute ampeaj kam, ihtỳj jũ caxuw me pahto ipintuw na me pajarên xà caxuw, ramã cuteme pamã Carõ Pejti jør, na quê ha ihtỳj to.

*Pahte me pajĩ tuw to me amji pytàr na ramã me pamã hahkre pej*

6-8 Ita pyrên me pajakry to, cu pahtỳj me pajũcanãr na amji mã me pahcarõt. Ne cormã pjê ita kam, ame papa xà ita kam, nee pahte me pantoa to me Pahpãm pupun nare cakrô, cu pahtỳj amji mã me to pahhimpej to mepapa. Ne pahte amji mã me to pahhimpej xà ata kôt ri, me pamã hahkre pej. Ne cu cormã me pajĩ ita kam amepapa xà ita kam, cormã nee Pahhiti cahê na me pajĩ tuwti ata kam ame papa xà nare na, pahte me amji jahkre pej. Ne pahtỳj me pamã, pahte me pajĩtũm ita pê me pajapôj,

ne ma Pahhiti cahê na me pajĩ tuwti ata mã me pancjêj na me pamã to prãm.

*Cu pahtỳj amji to me Pahpãm cajpuaw to prãm*

<sup>9</sup> Ne ampo pyxit peaj ata na ri me pamã ihprãm to prãm. Cu ha pahtỳj pjê kam, cormã me pajĩ tũm kam ame papa xà ata kam, amji to me Pahpãmcajpuaw to prãm, nare, cõjkwa kam me pajĩ tuw kam me papa xà ata kam, cu ha amji to me Pahpãm cajpuaw.

<sup>10</sup> Ne mêr ampo na mã cu pahte me ita ton xà? He cu ha jũ caxuw me pahcunea me pajõ Pahhiti pê Crixto cuna mã me pahcuhê, mâr quê catyt kam me pahcunea cukij, ne me ajpên pê me pahto haprã. Ne taa, cormã pjê kam me pajĩ tũm to me papa, nepahte me pajapên xà ton atajê jahpan xà na, ahpÿanre na me pamã amgõ pa. Ne me pahkwỳ te ampo pejti ton atajê to, quê ha impej, ne me pahkwỳte me ampo kên ton atajê to, quê ha apu ihkêanre ne.

*Jeju mã me pahkĩn xà ata, ihtỳj me pahto ihhimpej*

*Roman 6.4-6; Epet 4.22-24; Coroxo 3.9-10*

<sup>11</sup> Cwỳrjapê wa itỳj kypê amji mã me pajõ Pahhiti cupa to me ipa nare. Na wa itỳj Pahpãm wỳr me hàhtõa to me ipipkjêr to prãm. Pahpãm mã ihcunea na me ijahkre pej, cwỳrjapê wa nee me ipej mã me ipỳm prãmte, hỳrmã ame to ipipkjêr to me ipa nare na, cumã me ijahkre pej, ne hanea ne ahna me amã me ijahkre pej.

<sup>12-13</sup> He jũmjê itajê ri põ rũm pit mã amji to me cati prãm, na ri põ rũm pit mã ampo atajê na amji to me hàmnãn to me ipa. Ne ihhêj ne

ih̄t̄ȳj̄ j̄ũm̄j̄ê itajê te p̄õ r̄ũm̄ mento to me ipupun, ne nee meicaxwãm p̄ê, cute me ite amji kam me ijapac x̄à na me ijahkre pej nare kam, amã me ijarên to kêanre to:

— He Pawrô na mehkwȳ itajê te me amji-jahkre kêatre, ne ihhêj̄ ne ame kam waj — haj̄ȳr. Ne mehkwȳ me ijarên to:

— Cute me pamã ihhêj̄ x̄à ita caxuw, cute amji jahkre kitre nare — hane. Ne wa ha ite me ikam waj cakrô, wa it̄ȳj̄ cormã me amji to Pahpãm cajpuaw to ipa. Ne nee wa ame ikam waj nare, wa me ikrã impeaj kam me atoimpej to me ipa. Wa ite ramã me amã, me icaxwãm p̄ê ite me amji kam ijapac x̄à na me amji jarên. M̄ar ca at̄ȳj̄ me cumã me ikôt harê, ne nee ameijũ na apahàm nare. Ne nee m̄ã ite amji to me icati to prãm to, ite me amã ite amji kam me ijapac x̄à ita na me amji jarên nare.

<sup>14</sup> Ne Jeju Crixtō m̄ã me ik̄inti ata ri me ito ihhimpej to ipa, cw̄yr̄japê wa it̄ȳj̄ me atehcajpa. Ne por p̄ê Jeju p̄ê me pajõ Pahhiti pyxit peaj ne ty, ata cukwa kam ri ihhêj̄ ne me pahcunea te amji kam pajapac x̄à tũm̄ kênatajê tyc, ne hamre par.

<sup>15</sup> Ne p̄ê me pahcunea cw̄yr̄japê ty, ne me pancw̄yr̄japêa p̄ê hacp̄ȳa m̄ã iht̄ir, m̄ar cu pjê kam ame papa atajê, nee hipêr amji to me amji cajpuaw to prãm to ame papa nare. Ne quêt ihcajpuaw to prãm to, cu cumã ame papa.

*Jeju me pamã cute amji kam hapac x̄à tuw pejti gõ*

<sup>16</sup> Ita kam ri pahte amji kam me pajapac x̄à ita ajteare m̄ã, ne impej. Cw̄yr̄japê, cu ha nee pjê



kam, cute me amji kam hapac xà tũm ata kôt, jũmjê to amji kam me pajapac nare. He pê wa mam Jeju to me amji kam ijapac xà to hanea. Ne ita kam, wa nee hipêr me to hajÿr nare.

<sup>17</sup> Ne quê ha jũm Jeju Crixto to amji mã ihmipej, ne kam amji hõnco ata pê quê ha jũm tuwti ata. Ne ramã mam cute amji kam hapac xà tũmkên ata cupê hamre partu. Na quê ha quêt cute amji kam hapac xà tuw pejti ata kam apu ipa.

<sup>18</sup> Ne ampo pej itajê cunea Jeju kôt, Pahpãm pĩn, me pahwÿr pra. Ne pê mam me papê Pahpãm curê xwÿn. Ne Jeju cukwa kam ri cute hacpÿa mã, mepahto amji jô ikwÿ nõ. Ne cute hÿrmã mehkwy to ipipkjêr xà ata pê ri me pajapên xà, pê ahna me paxãm, mãr quê me pahcuxà hanea ne me to amji jô ikwÿ nõ.

<sup>19</sup> Na wa itÿj mehcunea mã Pahpãm jarên to:

— Pahpãm mã me ato hõ ikwÿ nõ na me ato prãm. Na ri cute Jeju Crixto cukwa kam, ate ame to kênxà atajê cunea to hapac kêt, ne to tojnõ — hane. Ne Pahpãm te, ite mehcunea mã me ita jarên na, me imã hÿjahkre.

*Cu Jeju me ajpên kam me pahhõnco, na ri Pahpãm te me pahna amjicaxàr*

<sup>20</sup> Cwÿrjapê pê Jeju harkwa na me iprar catêjê na me ipyxwÿ. Na wa me cumã me icakôc xà ata kam, ihhêj rũm Pahpãm ri me cumã ihcakôc, ne me ahna hàhwÿr to:

— Me icurê xwÿn itajê, cama amji na me ijamã, wa amjiwÿr me ato apkjê, ne me ato ikwÿ

nõ, cu ajpën to me ikwỳ nõ, ne ajpën kam me pahhõnco — hane.

<sup>21</sup> Pê nee Jeju Crixto jũ caxuw ampo kên ton nare. Ne nee kam ampo kên nõ incuire hamreare cakrô, mã Pahpãm te me pancwỳrjapê to amji kamhapac to ihhêj rûm, cute mehkên ton catêjê nõ. Ne cu Jeju me ajpën kam me pahhõnco xà ata kôt ri, Pahpãm te me pahna amji caxàr, mâr cuajpëan kam ame papa, quê ha ahna ihcaypuaw.

## 6

*Cu pahtỳj Pahpãm te me pahto impejti xà ata na me amji to pôtj*

*2 Corinti 6.1-18*

<sup>1</sup> Me ipê Pahpãm cahê na cumã me ijapên catêjê ita kam, wa ha me awỳ, mâr ca atỳj Pahpãm te hàhcaprĩa kam me ato impejti xà ata na me amji caxàr to impeaj ne.

<sup>2</sup> Ne pê ramã Ixaj xwỳ pê Pahpãm jarkwa na ihcakôc catê ata, ita na Pahpãm jarkwa kôt ihhôc to hane he:

“Wa, ate amji tehcajpar xà na me iwỳr xà atana, me akam ijapac prãam kam ikrĩ.

Ne me apytâr xà jõ amcro ata kam, ite itỳj me apytâr” hane.

Mêr hõhõ, me ikampa. He ita kam ri pahte me amjipytâr xà na, me Pahpãm na me pajàhwỳr xà. He ita kam ri ramã pahte me amji pytâr xà jõ amcroa kam hàhhuc.

*Pê Pawrô cupê catyt kam Pahpãm mã hàpên catê na amji jarê*

<sup>3</sup> Wa ite amji kôt me jũm te catyt kam ipa intête mehcahpêrkâr cupate, wa catyt kam me ipa, mãr quênee jũm, ite me ijàpên xà ton to me ipa ata na, ihcakôc kên nare.

<sup>4</sup> He wa itỳj quêt me ipê Pahpãm mã me ijàpên catêjê itajê na me amã amji to me ipipê to me ipa. Gapacta ne me ikam me ato xa ne me ipupuhe:

Wa itỳj ampo kên me, ite amji pupun kêanre me, ampo te amji wỳr me ikrã jacjên itajê mã, itỳj me ijũcanãr to me ipa.

<sup>5</sup> He hõtpê me icahhy, ne me ijacjê, ne me hàhtôa ne ihtỳj me ito kên prãmte me ikrã, ne ajpên wỳr me icapôr to me ipa cacrô, wa itỳjcatyt kam me Pahpãm mã apê.

Ne wa itỳj me ijapên to tỳaj to me ipa.

Ne wa hanea ne itỳj me ijikwa ne me ijõt xà kaj na, Pahpãm mã mehcajrên to me ipa.

Ne hanea ne prãm na ame ipa cacrô, wa itỳj catyt kam Pahpãmmã ijàpên to me ipa mã, me ijũcanãr to me ipa.

<sup>6</sup> Ne wa ampo kên ton xà ata pê ampỳa mã me ipa, ne Pahpãm te amji kam hapac xà ri quêt me imã hahkre pej to prãm.

Ne wa itỳj cute me ito kên catêjê atajê kam me icryc, mã me ijũcanãr to mentête amji jiprôn to me ipa. Ne quêt ijàhcaprĩa kam, catyt kam me to amji kam ijapac to me ipa.

Ne hanea ne ihtỳj Pahpãm Carõ Pejti te me imã amji jõr, wa ihkôat me ipa.

Ne hanea ne ihtỳj me imã mehcunea kїн, wa mehkїan kam me ipa.

<sup>7</sup> Ne wa hanea ne itỳj me cumã Pahpãm jarkwa hêj xi nare ata jarẽn to me ipa.

Ne hanea ne itỳj Pahpãm carôat kôt, me ijapên xà pihhoti catiaton to me ipa.

Ne wa catyt kam Pahpãm te amji kam hapac xà pejti kôt me ipa xà ita to me icurê xwỳn catêjê kam pra ne toa me cupê amji pytà, ne me tohjê.

<sup>8</sup> Ne ite me amã, ite amji kam me ijapac xà na amji jarẽn xà itajê, ihtỳj me ipê Pahpãm jarkwa na cumã me iprar catêjê impeaj na me ijarê.

Mã mehwỳ kwỳ ihtỳj me ito me icati, mã mehwỳ me ito ijôkrenõ, ne me imã ipahàm to.

Mã mehwỳ me ito mehcakôc to impejti, mã mehwỳ me ito mehcakôc kêanre.

He me ito hajỹr cakrô, wa nee itajê nõ na me toamji kam me ijapac nare.

Ne me cumãa, me papê me pahhêj xi catêjê cakrô,  
wa itỳj catyt kam ihêj xi xà nare to icakôc to me ipa.

<sup>9</sup> Ne me cumãa, nee me ipê jũmjê catihti atajê nare cakrô,  
mã me hàhtôa mã pjêcunea kam me ijahkre pej.

Ne me cumãa, wa ijôtpê amji to me ityc xà japên to me ipa cakrô,

wa itỳj me amji to me ipijapar to me ipa.

Ne ihtỳj me icahhyr to me ipa cakrô,  
nee cute amji mã me hamãr ne me ijipej nare.

<sup>10</sup> Ne me imã amji kїн nare cakrô,

hõtpê Pahpãm pyrên me ijakry.  
 Ne me ipê ampo hamreare cakrô,  
 wa itỳj ite, Pahpãm te amji kam hapac xà to,  
 me hàhtôa ne me to hakràj.  
 Ne me ipê ampo pê pjê itatekjê jamreare cakrô,  
 mã hõtpê me imãampo pê cõjkwa tekjê atajê  
 cunea.

*Pê Pawrô hirã pê, ihcunea na, me cumã amji  
 jarên pa*

<sup>11</sup> Corinti jõ krĩ kam me ikjêjê itajê, wa ite nee  
 ampo na me apê amji to ipimxur nare, ne quêt  
 hirãa pê me amã ihcunea na me amji jarên par.  
 Ne itỳj imã me akĩnti ata to ite me amã ipipê.

<sup>12</sup> Ne imã me akĩan to me akĩn cakrô, mã nee  
 ihhêj ne me amã me ikĩn nare.

<sup>13</sup> Ne Jeju kõt ihhêj rùm me apê me ikra  
 pyrãac. Ne imã me akĩnti ita jahpan xà na,  
 hanea ne hipêr amã me ikĩn.

*Cu ha nee me cupê Jeju na mehkwy nare atajê  
 cacaxà mã me paxàr nare*

*Epet 5.3-14; Tijac 4.4-5; 1 Petrô 4.1-6*

<sup>14</sup> Ne me apê Jeju to ate amji mã me ahimpej  
 catêjê atajê, ca ha nee amji mã me Jeju to  
 mehhimpej nare atajê me, me gápên xà na ame  
 ajpênpar, ne ajwar, ajpên cahê na me gápên  
 nare. Ampo na? Quê ha pijamã jũm krã impejti  
 ne catyt kam ipa atajê me, jũm krã kên ne amjia  
 kõtipa atajê me, ajpên cahê na me hàpên to me  
 ipa? Hãpà! Jũ wỳr quê ame amji mã hamã ne  
 ajpên cahê na me hàpên to me ipa. He xà quê  
 ajkĩ ihtỳj amcro me awcapàtkô ajcacwa? Hãpà!

15 He xà ajkĩ ihtỳj Jeju Crixto me Xatanaj mã ajpẽn cajrẽn? Hãpà! Me cupê ajpẽn curê xwỳn. Měr hõhõ, por jũmjê amji mã Jeju to mehhimpej to me ipa atajê, quê nee Jeju to amji mã mehhimpej nare atajê me, ajpẽn kam me ihhõnco nare, ne ajpẽn kaj na me ajpẽn kampa.

16 Quê ha pijamã jũm Pahpãm tĩr rohnỳtti mã ata jũrkwa wỳr pahpãm cahàc krekà tĩr nare ata to hỹrmã mõ, ne kam hãm? Hãpà! Jũ wỳr quê Pahpãm me, pahpãm cahàc krekà ata apu amji mã hamã, ne ajpẽn kõt amji kampa. Měr hõhõ, Pahpãm Carõ Pejtime pajĩ caxwãm pê ihkrĩ ita kam, ihhêj rũm me papê Pahpãm tĩr rohnỳtti mã ata jũrkwapyràac. He pê Pahpãm jarkwa to mehcajõc catêjê atajê me hàhtõa, ne ramã Pahpãm jarkwa na, hõ kàhhõc kam, ahna mehhõc to hane he:

“Wa ha itỳj me cahê na ikrĩ, ne mehcotea na apu ipa,  
ne pa amji to me hõ Pahpãm, quê ha me cupê me ikwỳ.

17 Na ca ha mehkrã kên catêjê te Pahpãm to amji mã mehhimpej nare atajê pê me acato,  
ne ajtea me cupê ampỳa mã ame apa.

Ne nee ca ha mehkõt cute me ampo kên ton xà atajê nõ ton nare.

Ca ha me to hane, wa ha itỳj me ana amji caxàr to imepej ne.

18 Na wa ha me Apãm Cati na amji to, ne me apê me ikra na me ato” hane.

Hõhõ, pê Pahhiti mehcunea jirôa pê carôt tỳjti  
ata, me ana amji jarẽn to hane.

**PAHPÃM JARKWA CUPAHTI JÕ KÀHHÔC**  
**Canela: PAHPÃM JARKWA CUPAHTI JÕ KÀHHÔC**  
**(Portions)**

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 1 Oct 2024 from source files  
dated 29 Jan 2022

09d4e460-c38b-52b7-81c1-8300bfeb466a